

Women's Club of Aruba ta rindi tributo na Sra. Marie Thérèse Croes (e.f.m.)



ORANJESTAD (AAN): Dialuna 31 di december 2018, Women's Club of Aruba (WCA) a tuma despedida di nos ex presidente, Life Member, un gran dama, un gran lider, un gran boluntario y un gran persona, Sra. Marie Thérèse Croes (e.f.m.) kende a fayece dia 27 di december 2018.

Pa Marie Thérèse, sirbi comunidad tabata su vocacion. For di un edad hopi hoben el a cuminsa yuda den diferente organisacion, semper activo y tumando iniciativa pa yuda den diferente proyecto pa comunidad.

Marie Thérèse a bin biba na Aruba for di Haiti na aña 1949 y tres aña despues, na 1952, el a casa cu e amor



di su bida, Sr. Max Croes y hunto nan a lanta 6 yiu.

Ora cu su prome 4 yiunan a crece poco, el a join diferente organisacion entre otro

Stichting Un Yuda Otro, Stichting Middelbaar Onderwijs Aruba (SMOA) y na 1967 Marie Thérèse a drenta den WCA.

Seis aña despues, na 1973, el a ser elegi como presidente di WCA, un organisacion cu e temponan ey tabata consisti di 350 dama, mayoria tabata e casanan di empleadonan

di LAGO. Pa prome biaha den 39 aña di existencia un dama local a tuma e rienda di WCA.

Durante su aña como presidente, Marie Thérèse a scoge pa haci un campaña masha grandi di TENE ARUBA LIMPI. E campaña tabata un exito, treciendo hopi concientisacion riba e necesidad di tene nos isla bunita y limpi.

Durante e siguiente añanan, Marie Thérèse a

Sigui lesa pag.10

Continuacion pagina.09



sigui hopi activo, trahando den diferente posicionnan den directiva y na aña 1985, el a acepta un biaha mas e presidencia, den un temporada hopi dificil pa Aruba y pa WCA. E tempo ey LAGO a cera y hopi di e miembronan activo a laga Aruba pa regresa nan pais.

E reto mas importante di e

aña ey tabata, pa purba atrae miembronan nobo tanto local como residentenan di otro pais.

Ora Marie Thérèse a ser reelegi na aña 1986, el a ser acerca pa un miembro, Sra. Alberta Smith, cu tabata purbando di organisa un seminario pa concientisa nos dokternan tocante e epidemia

mundial y e necesidad pa informa y alerta e poblacion di Aruba y nos dokternan. Marie Thérèse, cu tabata semper hopi interesá den e mundo di medicina, a incorpora mesora e proyecto di Concientisacion di HIV/AIDS como su proyecto di aña.

Asina e "AIDS Awareness

Committee" a cuminsa. Debi cu Sra. Smith a regresa su pais, Marie Thérèse mes a tuma e liderazgo di e comision. Di e momento ey, Marie Thérèse a pone su mes como meta, pa preveni HIV na Aruba, concientisando nos poblacion riba e syndrome aki, cu tabata causando hopi morto rond mundo.

Den colaboracion cu e Departamento di Salubridad y Gobierno di Aruba, e comision a organisa un seminario tocante AIDS, pa tur e dokternan trahando na Aruba. E seminario aki tabata un exito.

Na februari di 1987, WCA a cuminsa cu un programa di informacion pa e scolnan. E aña ey tambe, WCA a integra su mes den e Comision Nacional di AIDS, estableci pa e minister di Salubridad, mr. Watty Vos (e.f.m.) y e director di Landslaboratorium dr. Li-Fo-Sjoe, cu tabata e prome presidente di e comision.

Na 1988, e General Federation of Women's Clubs (GFWC) na USA a otorga un reconocimiento na WCA pa su proyecto di concientisacion di AIDS como e miho proyecto di 1988. E presidente di WCA, Sra. Enid Croes-Marugg, a apunta

Sra. Marie Therese pa bay ricibi e reconocimiento.

E mesun aña, e Center of Disease Control (C.D.C.) na Atlanta a invita Sra. Marie Thérèse Croes y Director di Departamento di Malesanan Infeccioso, Sr. Marcelino de Windt a bay tuma un curso pa bira un consehero pa e pashentnan di AIDS.

Durante hopi aña, nan dos a duna apoyo na e pashentnan di AIDS. Bou di nan guia Sr. Ruben Odor (e.f.m.) a anuncia publicamente cu e ta positivo pa AIDS.

Na 1993, WCA a publica un buki di poema di Ruben Odor "Mi Bida y AIDS".

Na 1998, WCA a publica 1.0000 foyeto di informacion di AIDS na Papiamentu y despues den 5 otro idioma mas.

Na aña 2000, WCA a join e UNAIDS Theme GROUP ARUBA, un plataforma multisectorial pa traha riba maneho riba e tereno di HIV/AIDS. Marie Thérèse Croes tabata un miembro

permanente di e grupo importante aki.

Na aña 2005 Sra. Marie Thérèse Croes hunto cu Sra. Dina Maria y Sr. Ruben Odor a establece Fundacion "E FARO". E meta di e fundacion ta pa duna informacion y apoyo na personanan bibando cu e virus di HIV na Aruba.

Durante e añanan, diferente miembro di WCA a dirigi e campananan anual di concientisacion di HIV. Pero sin duda, e motor principal tras di hopi proyecto ta Marie Thérèse. E tabata inspira e grupo pa sigui cu e trabou.

Semper su cas tabata habri pa reunionnan di WCA, especialmente esunnan di e comision di AIDS Awareness. Hopi di e material di informacion tabata warda na su cas y semper su famia y amigonan tabata duna un man ora cu tabata necesario. Su cas tabata e oficina principal pa e campananan di Carnaval di WCA, ya cu e ta situa cerca di e ruta di parada.

Marie Thérèse tabata un persona hopi determina y e tabata pone tur su empeño y dedicacion pa yega na e meta desea.

E tabata un miembro fiel y un di esnan cu tabata recauda masha hopi fondo pa yuda comunidad. E tabata semper presente na tur actividad, semper activo y cu su bunita smile.

E tabata digno di admiracion y tabata consider'e un mentor pa hopi di nos y un ehempel pa sigui den tur aspecto. Den comunidad e tabata ser yama "Mama di AIDS". Su consejo pa nos semper tabata: "Pone bo metanan bo dilanti y keda motiva bo mes pa sigui traha. Bo por haci tur cos cu bo ta propone."

Awendia nos ta tristo pasobra el a bay laga nos, pero eternamente agradecido WCA ta pa su enorme contribucion na nos organisacion y pa e comunidad di Aruba. Nos ta extende un biaha mas nos condolencia na su famia, su amigonan y na hopi hende na Aruba, cu tabatin e suerte di a conoc'e.

Descansa na paz, nos kerida amiga Marie Thérèse!